

BiH mora staviti svoje građane u prvi plan

Visoki predstavnik za BiH, Paddy Ashdown, sutra ujutro (petak) govoriće u Ženevi na konferenciji o budućnosti BiH pod nazivom “Deset godina nakon Dayton a i dalje”, koja se održava u znaku obilježavanja 10. godišnjice Dayton a.

Visoki predstavnik će reći da BiH kreće u novo razdoblje i naglasit će da će početak pregovora o Sporazumu o stabilizaciji i pridruživanju sa EU označiti odlučno odstupanje od poslijeratne daytonske stvarnosti. On će reći da ova zemlja u proteklih deset godina nikada nije imala tako jasnu viziju sopstvene budućnosti kao sada. «BiH se nalazi između postratne stabilizacije, s jedne strane, i tranzicije prema Evropi, s druge. Od sada imamo jasnu viziju o tome gdje idemo i šta treba da se uradi da tamo stignemo”.

Navodeći kako je sa usvajanjem Sporazuma o reformi policije koji je prihvatila Evropska komisija uklonjena i posljednja reformska prepreka za put prema EU, visoki predstavnik će konstatirati da su “osnovne institucije koje su potrebne za uredno funkcioniranje države osnovane – sada moramo učiniti da funkcioniraju na pravi način».

“Sada se moramo fokusirati na to da stvorimo državu kojoj će građani biti u prvom planu, a ne njeni političari”, reći će visoki predstavnik. “To znači smanjenje troškova vlasti, optimiziranje troškova eliminisanjem duplih usluga na različitim nivoima obimnog administrativnog sistema i usklađivanje plaća državnih službenika sa mogućnostima zemlje da ih podnese», reći će visoki predstavnik.

Nakon što se osigura proces stabilizacije i pridruživanja, potreba za ustavnim promjenama postat će očiglednija, izjavit će Visoki predstavnik. On će iznijeti stav da je Bosna i

Hercegovina možda otišla onoliko koliko je mogla sa sadašnjim ustavnim aparatom: "BiH sada mora načiniti promjene koje će joj omogućiti da nastavi put ka punom suverenitetu i stabilnosti, a iznad svega, da preusmjerava sredstva sa organa vlasti direktno prema građanima. Nijedna država ne može imati lojalnost svojih građana kada troši 70 posto poreskih prihoda na vlast a samo 30 posto na usluge koje se pružaju građanima".

On će pozdraviti činjenicu da o ustavnim promjenama sve više i više razgovaraju sami stanovnici Bosne i Hercegovine, ali će naglasiti da se ustavnim promjenama neće promijeniti Bosna i Hercegovina – njima će se samo otkloniti prepreke za tu promjenu.

Visoki predstavnik će reći da su ustavne promjene jedino moguće putem dijaloga i konsenzusa. One se ne mogu nametnuti niti provesti izvana. "Ovo je već uspješno provedeno u nekoliko navrata – tamo gdje su se prednosti ustupanja nadležnosti na državni nivo pokazale očiglednim", reći će visoki predstavnik.

Puni tekst obraćanja visokog predstavnika sutra će biti dostupan predstavnicima medija.